

明 權 衡 撰

庚 申 外 史

(國學文庫第四拾八編)

90515
4421

總發售處

北平隆福寺街 文殿閣書莊

明 權 衡 撰

庚申外史

(國學文庫第四拾八編)

總發售處

北平隆福寺街 文殿閣書莊

國立臺灣大學圖書館典藏
由國家圖書館數位化

據學津討原本重印



(實價國幣四角)

庚申外史

明吉水權衡以制父著

癸酉元統元年。先是歲壬申秋。文宗車駕在上都。八月疾大漸。召皇后及太子燕帖古思。大臣燕帖木兒曰。昔者晃忽叉之事。爲朕生平大錯。朕常中夜思之。悔之無及。燕帖古思雖爲朕子。朕固愛之。然今日大位。乃明宗之大位也。汝輩如愛朕。願召明宗子妥歡帖木兒來。使登大位。如是。朕雖見明宗於地下。亦可以有所措辭。而塞責耳。言訖而崩。晃忽叉者。乃明宗皇帝從北方來。飲毒而崩之地。燕帖木兒內懼。爲之躊躇者累日。忽念晃忽叉之事。已實造謀。恐妥歡帖木兒至而治其罪。姑祕文宗遺詔。屏而不發。因謂文宗后曰。阿婆且權守上位。玉室。妥歡帖木兒太子居南徼荒瘴之地。未知有無。我與宗戚諸王。徐議之可也。是時燕帖木兒以太平王爲右相。禮絕百僚。威焰赫赫。宗戚諸王無敢以爲言者。至至順四年三月。上位虛攝已久。內外頗以爲言。燕帖木兒始迎明宗皇帝幼子懿璘只班。登寶位。不發詔。不改元。踰月而崩。廟號寧宗。繼而燕帖木兒建

議欲立燕帖古思。文宗后固辭曰。天位至重。吾兒恐年少。豈不遭折死耶。妥懽帖木兒在廣靜江。可取他來爲帝。且先帝臨崩云云。言猶在耳。於是燕帖木兒知事不能已。遂奉太后詔旨。遣使至廣靜江。取妥懽帖木兒太子來京。太子行至良鄉。以郊祀鹵簿禮迎之。蓋燕帖木兒欲以此取悅太子之意。旣而燕帖木兒驅馬與太子並行。馬上舉鞭指示。告太子以國家多難。遣使奉迎之由。太子訖無一言以答之。燕帖木兒心疑懼。畱連至六月。方使登位。改元元統元年。尊文宗后爲皇太后。丞相燕帖木兒加太師。左丞相撒敦爲右丞相。伯顏爲樞密院知院。唐其勢爲御史大夫。撒敦者。燕太師之弟也。唐其勢者。太師之子也。徽政院使宦者高麗人禿滿。滿夕兒者。首薦高麗女子祁氏於帝。祁氏性慧黠。有寵於帝。秋九月。太后謂大臣曰。正宮未有人。何不選立之。眾對曰。今太師丞相有女。端嚴正大。宜爲天下母。於是立太師女伯牙吾氏爲后。后權臣家女。習於驕貴。又輕帝年幼。見帝寵祁氏。心不平之。日夜捶楚祁氏。幾不勝。一夕又跪祁

氏於前。竊問其罪。加烙其體。翌日。司天奏。昨夕火星犯后妃。帝雖不言。心甚異之。初世祖皇帝家法。賤高麗女子。不以入宮。至是始壞祖宗家法。識者知天下之將亂也。

甲戌元統二年。太師太平王燕帖木兒。自帝卽位以來。不復畱心政事。惟日溺於酒色。收晉邸后爲妻。諸公主嫁之者。四十餘人。有某王位公主。嫁及門三日。不得見。旣而傳旨曰。公主且歸。我要時來取。燕帖木兒宴趙中丞家。男女共席。名爲鴛鴦筵席。偶坐中有一婦人。顏色甚麗。太師目之。問曰。此爲誰。意欲畱之。左右告曰。此太師幾夫人某人也。由是酒色過度。體羸溺血而死。太尉伯顏陞爲右丞相。伯顏當帝在廣西。來入京師。宿畱汴梁。心方不測。朝廷權臣意其變。伯顏適爲汴梁省左平章。提所有蒙古漢軍。扈從入京。帝深德之。以扈從功。封太尉。至是。一旦爲相。居唐其勢上。唐其勢忿。曰。天下本我家天下也。伯顏何人。位居我上。或時裹甲帶刀。至伯顏家。或夜入都人家飲。然猛憨無術。實無他異謀。

也。

亥乙至元元年四月。右丞相伯顏奏曰。御史大夫唐其勢。與其弟答刺海爲文宗義子者。謀爲不軌。將不利社稷。有詔捕之。唐其勢攀檻不肯出。答刺海匿皇后袍下。右丞相復奏曰。豈有兄弟謀不軌。而姐妹可匿之乎。并執皇后。以付有司。后呼陛下救我。帝曰。汝兄弟欲害我。我如何救得。亦絞於東門外。唐其勢既死。命撒迪爲御史大夫。立翁吉刺氏爲皇后。乃世祖后察必之曾孫也。性莊厚。寡言笑。號正宮皇后。復立祁氏爲次宮皇后。居興聖宮。號興聖宮皇后。二宮並爲后。自此始。伯顏奏曰。陛下有太子。休教讀漢兒人書。漢兒人讀書。好生欺負人。往時。我行有把馬者。久不見。問之。云往應舉。未回。我不想科舉都是這等人得了。遂罷今年二月禮部科舉。

子丙至元二年。詔徵西域。匿刺麻。至京。禮爲帝師。仍以故太師燕帖木兒第賜之。
丑丁至元三年。以伯顏爲太師。答刺罕左丞相。封秦王。伯顏本鄰王家奴也。謂鄰

王爲使長。伯顏至是怒曰。我爲太師。位極人臣。豈容猶有使長耶。遂奏郟王謀爲不軌。殺郟王。并殺王子數人。初伯顏謀封秦王時。或告曰。秦王大名。恐不宜居。伯顏曰。我聞淮東有秦郵。我索秦郵爲秦王。非西秦也。何不可之有。時天下貢賦多入伯顏家者。省臺院官。皆出其門下。每罷朝。皆擁之而退。朝廷爲之空矣。禁漢人南人。不得持寸鐵。賜高年帛。禁百姓畜馬。品官畜馬有差。六月。天下謠傳。拘刷童男童女。民間皆望風成婚。河南棒胡反。棒胡者。河南鵠山縣人。好使棒。棒長六七尺。進退伎擊如神。遠近聞者稱棒胡。其徒弟百餘人。有名胡山花。亦善棒。開州人。輓軸李。陳州人。棒張。皆起兵應之。河南左丞慶童。將軍。敗之於鹿邑岡。擒之。號其岡爲得勝岡。伯顏數往太皇太后宮。或通宵不出。京師爲之語曰。上把君欺。下把民虐。倚恃著太皇太后。彗出紫微垣數十丈。凡十餘日。占者以爲應在十五年後。至期果驗。京師大水。朱光卿名硯山。亂於廣南之惠州。旣而復有李智甫。羅天麟。亂於閩漳。皆討平之。

黃^戊至元四年。詔郡縣舉隱逸士。詔修曲阜孔廟。袁州妖僧彭瑩玉。徒弟周子旺。以寅年寅月寅日寅時反。反者背心皆書佛字。以爲有佛字者。刀兵不能傷。人皆惑之。從者五千餘人。郡兵討平之。殺其子天生。地生。妻佛母。瑩玉遂逃匿於淮西民家。初瑩玉。本南泉山慈化寺東村莊民家子。寺僧有姓彭者。年踰六十歲。善觀氣色。一夕夜雪。見寺東約二十里紅焰半天。翌日召其莊老。詢之曰。昨夜二更時。汝村中得無失火乎。抑有他異事乎。內有一老曰。村中無事。惟舍下媳婦生一兒子。僧喜曰。盍與我爲徒弟可乎。老者遂捨爲僧。於是。以穀帛若干酬之。其子年十歲。始送入寺。與羣徒嬉。時預言禍福皆驗。年十五。南泉山下忽產一泉。甚冽。是時。民皆患疾疫。瑩玉以泉水施之。疾者皆愈。以故袁民翕然事之如神。及事敗。逃淮西。淮民聞其風。以故爭庇之。雖有司嚴捕。卒不能獲。伯顏與太皇太后。謀立燕帖古思而廢帝。其姪脫脫。頗聞其謀。竊以告其師吳直方。直方教之。以密告於帝。令知。而預爲之防。冬十一月。河南范孟端反。孟端者。河

南杞縣人也。始爲內臺知班。發身掾河南省臺。其人貧無資。寡交遊人。皆謂爲不辦事。鬱鬱不得志。又久不得補。一日大書省壁曰。人皆謂我不辦事。天下辦事有幾人。袖裏屠龍斬蛟。手埋沒青鋒二十春。後有守省御史來。與孟端有舊。力爲言之。乃得補。又不幫俸。孟端憾曰。我必殺若輩。一夕與其黨霍八失等約曰。我冬至日應直省。汝四人當以黃蠟爲彈丸狀。佩之。稱聖旨。劫鋪馬。乘昏夜入河南省中堂。坐定。喚當直掾史來。傳聖旨。我則佯應曰諾。有河南廉使段惟德。致仕在家。卽傳聖旨召之。使居省中權事。餘省官呼入者。汝皆傳聖旨。搥殺之。凡發號令。惟聽我施行。如此。大事必成。可以得志。富貴可共也。已而皆如其言。是日省中憲官置酒。皆醉於家。於是平章月魯不花左丞。劫理烈門金剛奴。郎中完者秃黑狹兒。都事拜住。總官撒思麻。監司秃滿。萬戶完者不花等。以次喚入。若使聽聖旨狀。卽以鐵骨朶自後搥死。棄尸後園。稱聖旨。除孟端爲河南都元帥。拘收大小衙門印章。自佩平章發兵虎符。調兵守城。把諸街巷中人。不

得往來。封閉黃河大江渡船。使南北毋通。發各道兵來聽調。孟端在省祭祖。去杞縣祭祖墳。經五日。久用金鼓。押諸衙門正官首領官凡若干人。斬於市。有馮二舍者。孟端用爲省宣使。使在外給事。馮因叩孟端曰。幸引我見朝廷官。孟端醉不覺。唾而言曰。何者爲朝廷官。我便是也。馮覺其僞。因隨孟端出。竊告省都鎮撫曰。使臣者僞也。可閉諸省門。勿納。我將圖之。於是殺孟端於外。時省中猶未信。擲其首示之。乃開門。持兵者入。霍八失等竄竹園中。遂俱撲殺之。當孟端反時。百官俛首聽命。獨歸暘不從。孟端問曰。朝廷以月魯輩有罪。別選人。歸先生。不願仕宦耶。暘曰。有母在堂。誠不願也。又問曰。歸先生不怕死耶。暘曰。死生有命。遂囚之。事敗得出。故天下多義之。

已至元五年冬。皇太子生。名愛育。失黎達臘。實興聖宮祁氏之子也。乳脫脫家。呼脫脫爲孀公。其後。脫脫因奏。令正宮皇后子之。十二月。伯顏請帝飛放。帝疾不往。伯顏固請燕帖古思太子同往。遂獵於柳林。脫脫竊告帝曰。伯父久有異

志。茲行率諸衛軍馬以行。往必不利於社稷。帝幸不與之俱往。其柰太子在柳林何。其夕卽召高保哥。月怯察兒。與之謀討伯顏。卸其軍權。於是先令月怯察兒。夜開城門。星馳往柳林。竊負燕帖古思太子入城。又忌翰林官泄其事。特使平章沙加班。召其館客范匯。毡裹之車中。載以入。賜之坐。諭以伯顏罪狀。卸其軍權誅之之意。使草詔。四更使只兒瓦及平章沙只班。齎詔向柳林。先卸其軍。天明。閉大都。詣城上。開讀詔書畢。御史大夫脫脫。踞坐城門上。傳聖旨曰。諸道隨從伯顏者並無罪。可卽時解散。各還本衛。所罪者。惟伯顏一人而已。伯顏養子詹因不花。知院答失蠻尙書。謂伯顏曰。擁兵入宮。問奸臣爲誰。尙未晚也。伯顏卻之曰。只爲汝輩常時與脫脫不和。致有今日。尙欲誤我也。情知皇帝豈有殺我之心。皆脫脫賊子之所爲也。言未既。又有詔到柳林。命伯顏除河南省左丞相。伯顏請入辭。帝使者不許。曰。皇帝有命。命丞相卽時起行。毋入辭。伯顏至河南。又有詔。令伯顏陽春縣安置。初伯顏過眞定時。父老捧獻果酒。伯顏謂父

老曰。爾曾見天下有子殺父之事乎。父老曰。不曾見子殺父。但見奴婢殺使長。蓋暗指伯顏殺郟王之事。伯顏聞之。俛首不語。殊有慚色也。臺臣奏曰。太皇太后非陛下母也。乃陛下嬖母也。前嘗推陛下母。墮燒羊爐中以死。父母之讐。不共戴天。乃貶太后東安州安置。太子燕帖古思。瀋陽路安置。乃使云都赤月怯察兒。押送瀋陽。太子忽心驚。知其將殺已矣。飛馬渡河而走。月怯察兒追之。拉其腰而死。云都赤者。帶刀宿衛之士也。初太后每言。帝不用心治天下。而乃專作嬉戲。常忤帝意。故此舉雖出於權臣。實亦帝心之所欲也。尙書高保哥奏言。昔文宗制治天下。有曰。我明宗在北之時。謂陛下素非其子。帝聞之大怒。立命撤去文宗神主於太廟。并問當時草詔者爲何人。遂欲殺虞伯生。集馬雍古祖常。二人呈上文宗御批。且曰。臣受勅紀載。實不獲已。脫脫在旁。因曰。彼皆負天下重名。後世只謂陛下殺此秀才。故捨之而不問。國初收江南歸附時。瀛國公幼君也。入都。自願爲僧。白塔寺中。號合尊大師。已而奉詔。居甘州山寺。有趙王

者。因嬉遊至其寺。憐國公年老且孤。畱一回回女子與之。延祐七年。女子有娠。四月十六日夜。生一男子。明宗自北方來。早行見其寺。上有龍文五采氣。卽物色得之。乃瀛國公所居室也。因問子之所居。得無有重寶乎。瀛國公曰。無有。固問之。則曰。今早五更。舍下生一男子耳。明宗大喜。因求爲子。并其母載以歸。

庚辰至元六年。伯顏行至江西豫章驛。飲藥而死。殮以杉木棺。置棺上藍寺中。云一

北塔寺

尸水流出戶外。人皆掩鼻而過之。籍其家。數月屏當不盡。米糠數房。燒餅

至一房。其豐也如此。或言伯顏家畜西番師婆。名畀畀。每間來歲吉凶。又問自己身後事當如何。畀畀曰。當死於南人手。故其秉政之時。禁軍器。刷馬匹。蒙古色目。毆漢人南人。不得回手等事。皆原於此。先是。阿叉赤大夫。完者帖木兒王。二人頗有節氣。見伯顏私通太后。殺鄰王。竊相議曰。此人有無君之心。不除之。必爲國家患。於是。截髮爲誓。私相約曰。但得閒卽行之一日。伯顏休息於家。二人立侍。或言云。都赤佩刀。乃水總管鑰鐵善刀也。阿叉赤卽借觀。稱善久之。伯

顏亦忻然起。披衣觀之。完者帖木兒王喜於得閒。從旁促阿又赤。阿又赤懼不敢發。完者帖木兒王疑其中變害己。因長跪。首曰。閒者阿又赤觀刀時。有害太師心。伯顏大怒。卽摔向前。阿又赤亦跪曰。此人常有害太師心。我不從。故反告我。卽併殺二人。而籍其家。其酷烈如此。命脫脫爲左丞相。益都忽爲右丞相。韓家奴爲御史大夫。汪家奴爲樞密使。初伯顏旣敗。其弟馬札兒台。以誅伯顏有功。故繼其位爲首相。僅半載。於通州置塌坊。開酒館。糟房。日至萬石。又使廣販長蘆淮南鹽。其子脫脫。不以爲然。嗾參政佛嘉問曰。吾父喜君。君所言無不聽。盍諫吾父。使解職閒居。不然。人將議我家。逐其兄。而攘其位。眾口甚可畏也。佛嘉問如其言。因乘閒諫之。馬札兒台果辭職家居。封爲太師。於是陞益都忽爲首相。而已副之焉。詔復行科舉。詔太廟四時祭享。賜天下高年米帛。蠲天下租五分。右丞相益都忽。左丞相脫脫奏曰。京師人烟百萬。薪芻負擔不便。今西山有煤炭。若都城開池。河上受金口灌注。通舟楫往來。西山之煤。可坐致於城中。

矣。遂起夫役。大開河五六十里。時方炎暑。民甚苦之。其河上接金口水。金口高。水瀉而下。湍悍纔流行一二時。衝壞地數里。都人大駭。遽報脫脫丞相。丞相亟命塞之。京師人曰。脫脫丞相開乾河。秋河北大水。

已辛至正元年。詔選儒臣歐陽玄。李好文。黃縉。許有壬等四人。五日一進講五經四書。寫大字。操琴彈古調。常御宣文閣。用心。前言往行。忻忻然有向慕之志焉。大興國子監。蒙古回回漢兒人三監生員。凡三千餘。然祭酒司業博士。多非其人。惟粉飾章句。補苴時務。以應故事而已。凡在諸生。日啖籠吹粉羹。一人之食。爲鈔五兩。君子以監學。乃作養人材之地。而千百爲羣。恣縱恬嬉。玩愒歲月。以嫚侮嘲謔爲賢行。加屏風以障市人。入茶酒肆。不償直。掉臂而出。無敢誰何。是壞天下人材。何作養之有。曩加孫監生也。積分試中。累官至祕丞。在朝鬱鬱。及爲分省右丞。一日奉擴廓命。入京師議事。揚揚過市中。大言曰。我今日只知有總兵。不知有皇帝。人聞其言。相顧問曰。此何官人也。或曰。此則往時監生曩加

孫也。人皆歎曰。此官所言。是報當日籠炊也。又有普賢奴者。亦監生也。積分中舉。歷官至左右司員外郎。因奉命至擴廓軍中。擴廓畱之。爲分省戶部尙書。已而京師大飢。遣戶部侍郎求糧於擴廓。普賢奴知之。請與相見。因責之曰。朝廷遣汝來求糧耶。歸語汝丞相。朝廷自紅軍禍亂以來。前後命總兵官勦捕。皆有供給官辦糧料。如鞏不班也。先帖木兒。泰不花。答失八都祿等。是也。獨我察罕父子總兵大河南北山東等處。並不曾費朝廷一毫供給糧料。而朝廷反求糧於我耶。參政張至道在側。因歎曰。三十二年天子。豈可使無一頓飽飯喫耶。遂啓擴廓。以山東糧米五千石。運入京師。監生所就。類如此。樞密院掾史杜遵道。棄去不仕。適潁川。遂爲紅軍舉首。先是伯顏丞相。馬札兒台爲知院。遵道爲書生。上言請開武舉。以收天下智謀勇力之士。馬札兒台遂補爲掾史。旣而知不能行其策。遂棄去。後爲賊中舉首。

壬至正二年。詔曲阜衍聖公。陞秩二品。慶元守王元。行鄉飲酒禮。詔譯唐貞觀

政要。二月。帝出厚載門。耕籍田。是年秋。監察御史言。宦官太盛。宜減宦官額。并宮女。蓋時宦者多高麗人爲之也。

癸未至正三年。鹵薄冕服新成。親祀南郊。時春二月也。議修遼金宋三史。丞相脫脫銳意欲成之。而所費浩大。錢糧經數不定。頗以爲憂。掾史行文書。丞相三卻之。掾史遂與國史院典籍謀之曰。丞相非不喜。蓋因錢糧無可措畫。然此亦易耳。江南三省南宋田。頗有貢士莊錢糧者。名路椿。寄倉庫盈積。有司亦常借用之。此項錢糧以爲修史費。孰曰不然。掾史卽日引見丞相。丞相聞其說甚喜。於是奏臣使儒臣歐陽玄。揭傒斯等。於國史院。修撰遼金宋三史。紹興守秦不花。行鄉飲酒禮。詔天下立常平倉。河決白茅口。冬十月七日。有事於南郊。前三日。裸於太室。拜享於列聖。次第至寧宗前。帝問禮儀使曰。我兄也。彼弟也。拜合禮否。禮儀使傳旨。問博士劉聞。對曰。寧宗皇帝雖是弟。已曾承宗器。而爲皇帝。時陛下亦嘗做他的臣子來。當拜。如春秋時魯國的諸侯。有閔公僖公。閔公是弟。



先做諸侯。僖公是兄。繼閔公後做諸侯。宗廟四時祭祀。未聞僖公不拜閔公。比這例兒。陛下合拜。帝乃拜。南郊禮畢。大赦天下。蠲民租五分。先是以五事備取守令。至是取守令以常平倉得法。奏成六事。

甲至正四年春。儒臣歐陽玄。揭傒斯等。修遼金宋三史告成。禮部引國史合院官。稟右丞相脫脫奏聞。脫脫搖首曰。此秀才事。我弗知。三稟三卻。眾皆患之。或曰。丞相好美名。今此史具列某某修。丞相見其名不列。宜其慍也。蓋稟之曰。自古前代史書。雖以史官秉筆。而總裁則必歸一人。如唐書則歐陽修總裁。資治通鑑則司馬光總裁。今遼金宋三國史事。屢蒙丞相奏用之力。某等謹以書丞相爲總裁官。丞相幸始終成之。以爲一代之盛典。豈不可乎。於是脫脫大喜。卽命掾史具進史儀禮。鼓吹導從。前後光輝。自史館進呈宣文閣。帝具禮服接之。觀者以爲近代無之。先是諸儒議論三國正統。久不決。至是脫脫獨斷曰。三國各與正統。各繫其年號。議者遂息。然君子終以爲非也。進史畢。大宴羣臣於宣

文閣脫脫奏曰。給事中殿中所紀錄。陛下卽位以來事迹。亦宜漸加修撰。收入金匱。上曰。朕行事。只在給事中殿中處之。待朕他日歸天去。令吾兒爲之可也。仍以御圖書封藏金匱。自今不許有所入。然不知給事中殿中。邇來皆公卿膏粱子弟爲之。其實瞽然。全無所書也。故庚申以來三十六年。史事並廢。太師馬札兒台告老。退居甘州。於是。有譖言行其間。父子各相猜疑。脫脫因乞致相位。願往甘州侍親。詔許之。初脫脫謀使其父辭位也。嘗奏帝。以其父之貪。不可使居大位。且密囑帝。倘其辭位。陛下宜卽許之。至是。帝亦因而許之。蓋憶其初用詭計于其父也。詔以阿魯圖廣王爲右丞相。以平章帖木兒達識爲左丞相。乙酉至正五年。以別怯兒不花爲右丞相。三月。詔曰。乃者。天災流行。積雨害稼。河失故道。民罹其殃。山東河南尤甚。朕夙夜憂惕。靜思其由。皆朕菲德所致。諸有盜賊竊發去處。限二十日悔過赦之。前所免租外。被災者全免之。已入者。準下年之數。

丙至正六年。詔遣奉使。巡行天下。黜陟幽明。問民疾苦。采訪賢俊。分十道處之。然奉使者。類皆脂韋貪濁。多非其人。惟四川一道。得王士熙。武子春。稍振剛紀。餘皆鼓吹而已。命選天下郡守。各于之官。曰。陛辭聽旨。諭之曰。汝守令之職。如牧羊然。飢也與之草。渴也與之水。飢飽勞逸。無失其時。則羊蕃息矣。汝爲我牧此民。毋使之失所。而有飢渴之患。則爲良牧守矣。時上方有勵精圖治之意。凡選轉某人爲官。必問曰。此人以前行過事迹。果一一皆善否。爲我悉陳之可也。徵處士脫因伯顏。杜本。張瑾。爲翰林待制。或議以爲擢用太峻。不可。帖木兒達識曰。隱士無求於朝廷。而朝廷有求於隱士。識者誦之。以爲名言云。

丁亥至正七年。徵處士張樞。不至。以朶兒只班爲右丞相。賀太平爲左丞相。

戊子至正八年。中書省修六條政類成。淮南北大水。

己丑至正九年。脫脫復入爲相。初脫脫侍親居甘州。太子愛育失黎達臘。與脫脫子加刺張同庚。以故加刺張獨畱京師。與太子同嬉戲。一日。帝與祁后同席。坐

偏殿。太子愛育失黎達臘與加刺張同戲殿外。愛育失黎達臘使加刺負。已作老鴉聲。旋繞殿墀三市。已而復使加刺作老鴉。而已負之亦三市。加刺跪曰。加刺張奴婢也。太子使長也。奴婢不敢使使長負。太子怒撻之。啼哭之聲聞於帝。帝問之曰。誰哭耶。左右曰。脫脫子加刺張也。問何爲而哭如是。左右具以對。上喜曰。賢哉此子也。祁后因起曰。脫脫好人。不宜久在外。上遂領之。會佛郎國進天馬。黑色五明。其頂高而下鈎。置之羣馬中。若橐駝之在羊隊也。上因歎曰。人中有脫脫。馬中有佛郎國馬。皆世間傑出者也。時有好臣哈麻者。在側聞此言。以爲脫脫且將復入爲相也。因乘閒遊說。薦之於帝。帝曰。彼嘗罪汝。杖汝一百七。汝何爲薦之。對曰。彼雖罪臣。當也。臣若仇之。不當也。何怨之有。其實此人好。其時。祁后於殿屏後竊聞之。陰使人走甘州。召之。一夕。脫脫至京師。乘昏入城。亦未敢見帝也。祁后俟帝有喜色。因誑加刺張於帝前。曰。汝亦思汝父脫脫耶。加刺張跪曰。思之也。后又誑曰。脫脫今何在。而汝欲思見之也。因起謝曰。脫脫

離闕久。思見至尊。今聞其入城在某處矣。上卽使人促入見。至則上在棕毛殿召入。正色問曰。我使汝侍親甘州。誰召汝來耶。祁后爲之失色。脫脫徐曰。郎主使奴婢侍親。今不幸親終服闋。故來爾。上遽起抱脫脫。相與泣慰之。翌日。故有再相之命。命中書洩祭三皇。翰林應奉危素。爲之樂章。

庚寅至正十年。戶部尙書薛世南。武子春。知脫脫有意興作庶事。蓋謂前相無聞其禮樂文章制度之事。漠如也。欲大有爲。以震耀於天下。超軼祖宗舊法。垂名竹帛於無窮也。薛世南。武子春。建言。謂至元鈔法經久。當變制。宜爲中統交鈔法。交鈔貫文與銅錢子母。相權並用。脫脫奏用其言。立寶泉提舉司。鑄至正通寶錢。先兩日。脫脫丞相率省屬。下學會議。至階。祭酒呂思誠下階迎。丞相東向坐。祭酒西向坐。省官列坐丞相下。敎官列坐祭酒下。無一人敢有異議者。於是改鈔法。遂行。明日。祭酒忽至中書省。言曰。丞相母聽薛武兩少年之言。改鈔法。非祖宗舊制也。丞相若聽之。必亂天下。後數日。盡奪呂思誠祭酒所授勅。時亦

議裁減冗官。併省衙門數事。或曰。呂祭酒當議之時。不措一辭。及議定。惟有發怒罵詈而已。春三月。河北大雪。深三尺。南陽總管莊文昭來言。本郡鴉路有上馬賊百十爲羣。突入富家。計其家貲。邀求銀爲撒花。或劫州縣官庫。取輕資。約束裝載畢。乃拘妓女。置酒高會三日。乃上馬去。州郡初無武備。無如之何。於是始命立天下兵馬分司。凡五處。然不究其本。而徒事其末。終亦不能禁也。

辛卯至正十一年。歸德知府觀音奴言。今河決白茅。日徙而北。失其故道。當疏塞以爲地利。脫脫喜其言。命工部尙書成遵往相視焉。還言。工不可興。浩大難成。且現今南陽安豐盜賊成羣。萬一與挑河人夫相挺而雜起。此大亂之機。非細事也。決不可從。脫脫不聽。左遷成遵爲長蘆鹽運使。更問京畿漕運使賈魯曰。汝前爲張秋都水時。知河之利害。可疏鑿否。賈魯澤潞人。素有進取志。遂應聲曰。可。因悉言其狀。乃奏魯爲工部尙書兼河防使。四月二十二日。發河南淮南北軍民二十萬。其費以億萬計。府庫爲空。有龔伯遂者。小有才。汲汲以富貴爲

心進言脫脫曰。丞相大興利害可也。然必大有誅賞。始可以懾伏眾情。於是起大獄。以謀害大臣。置前相高昌王益都忽并韓家奴等於死地。刑賞失措。又興挑河工役。所在肆虐。又併省衙門。沙汰吏胥。無所容跡。遂相繼入于盜賊之黨矣。五月。潁川潁上紅軍起。號爲香軍。蓋以燒香禮彌勒佛。得此名也。其始出趙州灤城縣韓學究家。已而河淮襄陝之民。翕然從之。故荆襄漢許汝山東豐沛以及兩淮紅軍。皆起應之。潁上者推杜遵道爲首。陷成皋。據倉粟。招集亡命。從者數十萬。陷汝寧光息信陽。起靳黃者。宗彭瑩玉和尚。推徐眞逸名壽輝爲首。陷德安沔陽安陸武昌江陵江西諸郡。起湘漢者。推布王三。孟海馬爲首。布王三號北瑣紅軍。奄有唐鄧南陽嵩汝河南府。孟海馬號南瑣紅軍。奄有均房襄陽荆門歸峽。起豐沛者。推芝麻李爲首。芝麻李者。邳州人也。值歲飢。其家惟有芝麻一倉。盡以賑人。故得此名。賈魯挑黃河。所在廢民業。民心不安。芝麻李與鄰人趙君用。謀起事。曰。朝廷妄興土木之功。百姓貧苦無告。吾聞潁上香軍起。

官軍無如之何。當此之時。眞男子取富貴之秋也。君用者。趙社長也。曰我所知。惟某人某人可用。燕城南彭二。其人勇悍有膽略。不得其人。不可舉大事也。我當爲汝致之。卽訪其家。入門見其人方厲斧斤。謂之曰。汝厲斧斤。將何爲耶。彭二應曰。州縣云有賑濟。日日候之。實誤事。飢無所得。我將伐薪入城。換米喫。可以度日。官府不足信也。君用曰。噫。吾視汝膂力過人。何處不得一頓飽飯喫耶。因作色曰。汝能從我謀事。豈但衣食而已。富貴從汝。彭二卽解其意曰。其中有芝麻李乎。曰有。有吾當從之。遂引見芝麻李。因得八人。歃血同盟。於是年八月十日。佯爲挑河夫。倉皇投徐州城。乘夜突入門。卒拒之。則曰。我挑河夫也。借一宿何傷。一半入城。一半畱城外。至四更。城內四人。爇四火。吶喊一聲。城外四人。亦爇四火。應之。內外迭喊。城中大亂。四人者俱奪守門軍軍器。亂殺。門開。城外四人入。同聲叫殺。民久不見兵革。一時見亂起。皆束手從命。天明。又樹大旗。募人爲軍。從之者亦十餘萬。浮橋四出。掠地。奄有徐州近縣及宿州五河虹縣豐

沛靈壁西并安豐濠泗。事聞朝廷。省吏抱牘。題曰謀反事。至脫脫前。觀其題。改題曰河南人謀反事。識者知元朝不能有天下矣。河南漢人可盡誅乎。其後。張士誠起於淮海。趙明達起於徐州。毛貴起於山東。明玉珍起於四川。獨本朝龍興淮南。卽以建康爲天下根本。東征西伐。南誅北討。四海人心內附。皆有後。來蘇之望。元之國祚盡矣。先是。嘗有童謠曰。富漢莫起樓。貧漢莫起屋。但看羊兒年。便是吳家國。迨本朝定都建康。築壇於建康南門。郊天受命。改元朝至正二十七年。爲吳元年。實丁未歲也。豈不驗哉。天命有所歸。豈人力之所能爲耶。朝廷聞紅軍起。命樞密院同知赫廝禿赤。領阿速軍六千并各支漢軍。討潁上紅軍。阿速者。綠睛回回也。素號精悍。善騎射。與河南行省徐左丞。俱進軍。其二將但以酒色爲務。軍士但以剽掠爲務。於剿捕之方。漫不加省。赫廝軍馬望見紅軍陣。大揚鞭。曰阿卜阿卜。阿卜者。華言走也。於是所部皆走。至今淮人傳以爲笑。其後。赫廝死於上蔡。徐左丞相爲朝廷所誅。阿速軍不習水戰。不伏水土。

病死者過半。十二月。布王三陷鄧州襄陽。

辰壬

至正十二年正月。孟海馬陷襄陽。徐眞逸陷湖廣。其將會元帥法興陷安陸。

江陵。脫脫爲相。諱言中原兵亂。哈麻因而媒斃其過。帝召脫脫。怒責之曰。汝嘗言天下太平無事。今紅軍半宇內。丞相以何策待之。脫脫汗流浹背。未幾。自請督軍下徐州兵出。有淮東豪民王宣者。亦上言。鹽丁本野夫。不如募城市趨勇慣捷者。可以攻城。前後各得三萬人。皆黃衣黃帽。號曰黃軍。脫脫知城有可克之狀。下令各將。乃事厲兵。俟我至。卽攻之。須臾脫脫至。一鼓攻之。遂夷其城。芝麻李遁去。又調阿吉刺太尉。攻汝寧。汝寧紅軍懼。退保亳州。阿吉刺攻平汝寧城。時赫廝旣死。朝廷別命鞏卜班平章爲將。領侍衛漢軍。合愛馬韃靼軍。合數萬眾。屯汝寧沙河岸。日夜沈溺酒色。醉臥不醒。敵人偷營。遽失大將所在。次日鬪死人。得其尸。軍遂退數百里。屯項城縣。又命御史大夫也先帖木兒。代爲總兵。凡

精兵三十餘萬。金銀物帛車數千兩。河南北供億計億萬。前後兵出之盛。無如此者。也。先帖木兒駐軍沙河。未及兩月。軍中夜驚。也先盡棄軍資器械糧運車輜山積。僅收散卒萬人。直抵汴城下。時濟王在城頭。遙謂之曰。汝爲大將。見敵不殺。何故自潰。吾將劾汝。此城必不容汝也。遂離城南四十里。朱仙鎮屯焉。朝廷乃命蠻子平章代之也。先徑歸燕京。暮入城。明日仍爲御史大夫。當時官軍不足用。類如此。故王宣建言募鹽丁。豈亦識時務者歟。而十數年前見機最早者。惟杜遵道一人也。賈魯治黃河。疏四里村。塞黃龍江口。立回龍廟於岸上。水由故道行。先是。河南北童謠云。石人一隻眼。跳動黃河。天下反。及魯治河。果於黃陵岡。得石人一眼。而汝潁始亂。脫脫見盜賊四起。凡議軍事。每迴避漢人南人。時方入內奏事。回顧中書韓伯高。韓大雅。隨後來。遽令門者勿入。奏曰。方今河南漢人反。宜榜示天下。令一概勦捕。諸蒙古色目。因遷謫定在外。皆召還京。勿令誣誤。於是榜出。河北之民。皆變而從紅軍矣。中書左司郎中田本初言。江

南漕運不至。宜墾內地課種。昔漁陽太守張堪種稻八百餘頃。今其跡尙存。可舉行之。於是起山東益都濮陽等一十三路農民種之。秋收課所得。不償所費。次年農民皆散罷去。冬復立庸田使司於江南。咬住平江陵。答失八都魯平襄陽。

已癸至正十三年。脫脫奏用哈麻爲宣政院使。哈麻旣得幸於上。陰薦西番僧行運氣之術者。號演樸兒。法能使人身之氣。或消或脹。或伸或縮。以蠱惑上心。哈麻自是日親近左右。號爲倚納。是時資政院使隴卜亦進西番僧伽璘眞。善此術者。號祕密佛法。謂上曰。陛下雖貴爲天子。富有四海。亦不過保有現世而已。人生能幾何。當受我祕密大喜樂禪定。又名多修法。其樂無窮。上喜。命哈麻傳旨。封爲司徒。以四女爲供養。西番僧爲大元國師。以三女爲供養。國師又薦老的沙。巴郎太子。答刺馬的。禿魯帖木兒。脫歡。孛的。蛙麻。納哈出。速哥帖木兒。薛答里麻。十人。皆號倚納。老的沙。帝母舅也。巴郎太子。帝弟也。在帝前。男女裸交。

或君臣共被。且爲約相讓以室。名曰些郎兀該。華言事無礙也。倚納輩用高麗姬。爲耳目。刺探公卿貴人之命婦。市井臣庶之麗配。擇其喜悅男事者。媒入宮中。數日乃出。庶人家喜得金帛。貴人家。私竊喜曰。夫君賴選。可以無窒滯矣。上都穆清閣成。連延數百間。千門萬戶。取婦女實之。爲大喜樂故也。脫脫平徐州。以得芝麻李奏功。旣而陰構朝旨。令班師。使者六七返。帝始令月怯察兒代之。月餘。始獲芝麻李。梏送京師。脫脫密令人就雄州殺之。潁川沈邱探馬赤軍察罕帖木兒。與羅山縣典史李思齊。集眾號義兵。克復羅山縣。州奏功。朝廷授察罕羅山縣達魯花赤。授李思齊縣尹。上曰。人言國家輕漢人。如此果輕漢人也。下吏部再議。於是。察罕授汝寧府達魯花赤。李思齊知汝寧府。冬十二月二十七日。天鼓響於東北。

^甲至正十四年正月。汴水冰花。二月朔。日食。張士誠起兵泰州。遂據高郵。截南北路。倚納十人。相與竊議。脫脫在不可諧。於是同謀。令太史王監丞。奏連夕相

星犯帝。自是帝疑脫脫。脫脫始無援矣。內無后援。而外有倚納十人之譖。識者皆知脫脫不返矣。秋八月二日。脫脫總天下兵。征高郵。十月。大軍至高郵。連戰大捷。分兵平六合。進圍高郵。城中幾不支。日議降附。又恐罪在不赦。當是時。脫脫權重。內握朝柄。外總兵馬。指揮天下。以爲指日收成功矣。中書右丞哈麻與脫脫有隙。諷御史大夫以老師費財。彈擊脫脫。帝信其言。詔卸脫脫兵柄。淮安安置。令樞密院老張代之。詔至軍。值奮力攻城時。軍士聞之。皆大哭。當詔未開讀時。龔伯遂進曰。始丞相出師時。親奉皇帝玉音。以爲在後事體。朕再有密旨來。今丞相在軍。止奉皇帝密旨。一意進取可也。詔書且勿聽。事既久。小人讒言。自然明白矣。且將在軍。君命有所不受。爲是故也。脫脫搖首曰。不可。詔我而不從。是與帝相抗拒也。遂受詔。大軍百萬。一時四散。先是諸大臣子弟領軍從行者。哈麻歷告其家。陰遣人先來軍中。白其長曰。詔書且至。不卽散者。當族誅。故散之。之遽如此。其散而無所附者。多從紅軍。鐵甲一軍。入襄陽。號鐵甲兵者。是

也。脫脫卸軍。在淮安一月。詔復使西行。鳩死於吐番境上。是時高郵危困已甚。脫脫分兵定眞州。平六合。及將攻徐濠。遠近凜然。國勢漸張。而哈麻奸臣邪謀。誤國。遂至危亡不救。可勝惜哉。是歲省吉大夫。以舟師自安慶征湖廣。至湖口。適與蘄黃之紅軍遇。風勢不利。敗績死之。紅軍遂順流而下。攻安慶。爲義兵所破。大敗南還。旣而蠻子海牙中丞。復總水軍。義軍南征。破黃連大寨。徐眞逸等遁入黃梅山中。及沔陽湖中。官軍盡復武昌等處。未幾。盡抽軍下。據廬州。官軍勢退。而賊勢復熾矣。亦憐只班丞相。以馬步軍由江東援江西。至龍興。逾月而卒。左丞火彌赤代總其兵。攻臨江。復瑞州。進攻袁州。與歐軍相持。數年不決。後卒敗亡。

乙未至正十五年。湖廣苗軍聽調。營於汴梁東。其帥吳天保死。裨將王陳叛。入京西。遂陷陳州許州。西至虎牢關。命答失八都魯討之。以汪家奴爲右丞相。鼎住爲左丞相。哈麻爲平章。數月。鼎住薨。哈麻升爲左丞相。母弟雪雪爲御史大夫。

倚納十人皆進職。立興聖宮。祁后子愛育失黎達臘。爲皇太子。命翰林學士行册文。有曰家法曰齊心法曰正。又曰存心養性者守身。爲事親之大。任賢去邪者。知人。爲安民之方。勿謂穹昊之高。一誠意而庶徵應。勿謂宮庭之奧。一善言而萬方知。與治同道。則唐虞之俗可還。主善爲師。則舜禹之域斯至。君子以爲徒訓也。劉福通劫敗。答失八都魯于長葛營。趙明達陷嵩汝。攻洛陽。明元帥入西川陷之。

丙至正十六年。哈麻既得相位。醜前所薦西番僧所爲。恐爲當世及後人所非議。乃以他罪杖西番僧一百七。流於甘州。僞若初未嘗薦之者。又私念以爲謬。乃謂其父篤魯國公曰。我兄弟二人。一爲丞相。一爲大夫。皆荷祖宗德澤。但妹壻秃魯帖木兒。在上位前。近行汙褻無禮。恐爲天下士大夫所譏笑。我兄弟何面目見人。盍除之。以爲吾利。不意其妹屏間竊聞之。急歸告其夫。翌日有旨。哈麻休入臺。又有旨。哈麻安置惠州。雪雪安置大寧。道中皆打殺。河南行省平章

秦不花。駐軍南陽嵩汝。招降叛民百萬。軍聲大振。秋復唐隨安陸沔陽德安以及蘄黃等州。詔升河南行省爲左丞相。賀太平再入朝爲右丞相。初大理宣慰司同知達失八都魯爲四川參政。引兵自巴蜀來。克復襄陽均房等州。調入中原。頗有功。至是。陞爲河南行省平章。兼知行樞密院。是歲。本朝起建康。張士誠據平江。危素爲司農司丞。於京南雄霸等州屯種。給京師。號曰京糧。爲浙西被陷。海運不通故也。

丁酉至正十七年。詔達失八都魯至京師。帝見之。私謂侍人曰。此人死期至矣。罷還軍。先是。秦不花以軍士失律。劫掠汴民。南臺御史彈之。有旨。卸其軍。剝其職。以白衣聽調。至是。復命爲湖廣行省左丞相。仍提前軍。往征山東毛貴。答失八都魯止率本部兵。渡河。征曹州盛文郁。於是。二將皆渡河而北。河南之境。相繼而陷。劉福通入據之。迎其主小明王於亳州。入都於汴梁之皇城。分河北關先生。沙劉二。領兵入晉冀。由朔方攻上都。分淮安趙君用部將毛貴兵。合田豐。趨

大都而帝方與倚納十人。行大喜樂法。帽帶金玉佛。手執數珠。以宮女十六人。首垂髮數辮。戴象牙冠。身披纓絡大紅銷金長短裙襖雲裾合袖天衣綬帶鞋襪。唱金字經。舞鴈兒舞。名十六天魔舞。又有美女百人。亦皆纓絡。各執加己刺般之器。內一人執鈴杵奏樂。又宮女十一人。練搥髻勒帕常服。或用唐帽窄衫。所奏樂器。用龍笛頭管小鼓箏箏琵琶笙胡琴響板拍板。以宦者長安不花領之。每遇宮中讚佛。則按舞奏樂。宦官非受祕密戒者。不得預。是時。達失八都魯死。其子孛羅帖木兒代領其眾。朝廷因而使之鎮西京。毛貴由海道得海舟。長驅破益都義兵。黃軍下萬戶田豐叛。入紅軍。遂破東昌東平大名。罷商稅。罷寶泉提舉司。

戊至正十八年。秦不花忿賀太平本漢人而居相位。己乃勤勞於外表。索賀太平軍前供給。恐朝廷不從。駐兵彰德。玩寇不進。太平以計殺之於保定。并其子壽童。駙馬以紐的該爲添設丞相。山東毛貴兵由濟南犯棗林。去京師百二十

里。京師大震。值泰不花裨將劉哈刺不花領兵自晉冀來。擊卻之。以功。由尙書升平章。義兵察罕帖木兒。以八月克復汴梁。小明王遁入安豐。關先生。沙劉二。破頭潘等。由大同直趨上都。焚毀宮殿。犯虎賁司。去上都二百里。世祖所立三十六屯在焉。先是大雪。二百里間。人跡不通。至是雪晴。煖氣如春日。西京孛羅帖木兒。饋京師糧數千車。帝嘗爲近幸臣建宅。自畫屋樣。又自削木構宮。高尺餘。棟梁楹檻。宛轉皆具。付匠者。按此式爲之。京師遂稱魯班天子。內侍利其金珠之飾。告帝曰。此房屋。比某人家殊陋劣。帝輒命易之。內侍由此刮金珠而去。二后見帝造作不已。嘗挽帝衣。極諫且曰。勞心造作。又惑天魔隊舞衣女。何其不自愛聖躬也。帝艷然怒曰。古今只我一人耶。由此兩月不到後宮。祗后無可柰何。乃畜高麗美女。大臣有權者。輒以此女送之。京師達官貴人。必得高麗女。爲名家。高麗女婉媚。善事人。至則立見奪寵也。自至正以來。宮中給事使令。大半爲高麗女。以故四方衣冠靴帽。大抵皆依高麗矣。帝嘗謂倚納曰。太子不曉

祕密佛法。祕密佛法可以益壽延年。乃令禿魯帖木兒。教太子以佛法。未幾。太子亦惑溺於邪道矣。噫。

己亥至正十九年。破頭潘。關先生。趨廣寧。焚魯王宮府。駐軍遼陽。賀太平當相位。奏用其子也。先忽都兒爲詹事。以爲總兵。總大軍。取遼陽。太平意謂關先生。破頭潘。自晉冀西京。歷上都。軍常無畱行。其破遼陽。必不能久居。可以取遼陽。功成。其子至。則關潘軍日治戰馬。一無退意也。先忽都兒畏之。宿畱不前。竟潰而歸。乘夜入城。仍陞爲集賢學士。先是。太平常采聲譽。用程遵。蕭庸。趙中等。布列省部。遵等亦俯首從之。及也先忽都敗還。反以爲功。陞學士。相與歎曰。朝廷賞罰無章。紀綱掃地。乃至如此。將陳其罪。親近者竊以告太平。太平頗以爲憾。京師大飢。民殍死近百萬。十一門外。各掘萬人坑掩之。鴟鵂百羣。夜鳴至曉。連月乃止。居庸關子規啼。太子召指空和尚。問民飢饉何以療之。指空曰。海運且至。何憂。秋福建運糧數十萬至京師。先是。朝廷以張士誠內附。封爲太尉。且以歲

飢。遣使督海運糧。儲於京師。時張士誠據浙西有糧。方國珍據浙東有船。二家攻戰不和。糧竟不至。賴福建瀕海。尙爲王土。獨能運糧至京師。由是京師民再活矣。當元統至元間。國家承平之時。一歲糧入京師。至一千三百五萬八千八百六十四石。而江浙四分強。河南二分強。江西一分強。腹裏一分強。湖廣陝西遼陽總二分。通計十分也。金入凡三百餘錠。銀入凡一千餘錠。鈔本入一千餘萬錠。絲入凡一百餘萬斤。綿入凡七萬餘斤。布帛入凡四十八萬餘疋。而江浙常居其半。及張有浙西。方有浙東。而京師索然。識者以爲元之氣數不推可知也。指空者。西番剌帝利王第三子也。狀貌魁偉。不去鬚鬢。服食擬於王者。居京師四十年。習靜一室。未嘗出門。王公貴人多見呵斥。雖帝亦不免。百八歲而死。甘露降文宣王廟樹上。凝如白霜。其味甜。黃河清鄭州長數里。貴赤衛韓僉事家次子死數年。長子又爲孛羅帖木兒拘于西京。父母悲歎。老失二兒。貧無以爲食。早夜哭泣。方哭泣。忽聞次子來告。曰吾兄將西京米麥來且至。父母可勿

憂已而果然。自此往來其家。聞言語如生人者。半年。其家童兒盡能見其容貌服色。一日來告父母曰。阿爺阿孀。可遷西房。兒欲歸東房。將以某日娶婦。至期。家童余亨窺見筵席賓客之盛。又聞歌舞雜劇之聲數日。其京城不祥有如此。建清寧殿外爲百花宮。繞殿一市。帝以舊例五日一移宮。不厭其所欲。又酷嗜天魔舞女。恐宰臣以舊例言。乃掘地道。盛飾其中。從地道數往。就天魔舞女。以夜作晝。外人初不知也。帝又造龍舟。巧其機括。能使龍尾鬣皆動。而龍爪自撥水中。帝每登龍舟。用采女盛粧。兩岸挽之。一時意興所屬。輒呼而幸之。又令諸妃嬪三十餘人。皆受大喜樂佛戒。諸倉積儲。盡入女寵家。百官俸。則祇支以茶紙雜物之類。冬十二月。左丞成遵。參政蕭庸等六人。丞相賀太平。誣以贓罪。皆杖一百七下流死。先是。祁后與太子。謀求內禪。使宦者樸不花。邀賀太平。籌之。太平不應。復邀太平。用其黨數人。太平又不許。太子銜之。一日。太子倡言於中書省堂曰。我所用者。汝皆沮之而止。汝所用者。今皆以贓敗。何也。太平對曰。所

知者才也。故用之。所不知者心也。雖父子之間。亦不能保其無私也。太平由是稱病。懇求免相位。初。祁后與太子謀曰。太平既不允內禪之事。不可使居相位。兀良哈歹其人於汝無所可否。今以總兵居真定。宜勸上召還京師。當以代之。庶幾汝事可求也。既而果有旨。召還京師。太平覺其有謀。嗾臺官劾其罪。有旨令兀良哈歹居興州。逾一月。以無疾卒。太子心疑太平害之。故怨之愈深。

庚子至正二十年春二月十九日。罷賀太平爲太保。是月。搠思監爲右丞相。蓋老的沙所薦也。初。上欲罷太平相。謀於老的沙。老的沙欲自爲之。而難於發言。遂薦搠思監。帝於是以搠思監爲右丞相。老的沙復爲大夫。二人既拜。老的沙恃有薦相之恩。數有干請。搠思監不答。二人遂有隙。其後。搠思監恃有祁后太子之援。老的沙恃有皇上母黨之親。怨日益深矣。夏五月朔。日有食之。陽翟王阿魯輝帖木兒擁兵號百萬。傳檄問京師之罪。有曰。祖宗付汝以天下。今何故失其大半。汝不可以居祖宗大位。將傳國璽送與我。我當代汝爲之。帝聞之。顏色

不變。徐曰。他果有天命。我何不避之有。乃命樞密知院哈刺朶兒只。禿堅帖木兒。八里達。逆擊之。行至稱海。復起哈刺赤。采人爲軍。臨陣。皆脫黑衣。從宗王。與合勢。追奔百里。三知院單馬遁入上都。破頭潘。關先生。沙劉二軍。入高麗王京。高麗王奔耽羅。其臣納女請降。將校皆以女子配之。軍士遂與高麗如姻婭。恣情來往。高麗人因而竊其馬。藏林中。一夕。王傳令。除高麗聲音語者不殺。其餘並殺之。沙劉二。關先生皆死。惟破頭潘并裨將左李。率輕騎萬人。從閒道走西京。降孛羅帖木兒。聽調。已而又降擴廓帖木兒。初賀太平辭相時。帝賜以金銀幣帛駝馬。使之歸老於故所生地。太平既出京城。沿途畱宿不進。搆思監疑其徘徊顧望。猶有希進之意。諷御史彈之。竟以計害太平。併其子也。先忽都殺之於野馬川。

丑辛至正二十一年。帝更命少保老張。率兵四十萬。擊陽翟王阿魯輝帖木兒。老張軍未至。王軍有脫歡知院者。內叛。擒王獻京師。王臨刑。罵不絕口。舊例。宗王

有罪大。故用弓弦絞之。名曰賜死。至是。帝特殺死。陳友諒。徐真逸之臣也。已而握權。篡其位。沈真逸於江。掌其湖廣江西之地。建都於江州。至是大兵克江州。友諒走武昌。其將守龍興者。以江西降。時八月二十四日也。九月。命察罕帖木兒。征山東。山東。自毛貴爲趙君用所殺。其將續繼祖爲復仇。殺君用。國內遂大亂。花馬王田豐。掃地王王士誠。互相攻伐。察罕帖木兒乘之。破其冠州東昌濟南諸郡。進圍益都。田豐來降。時豐提兵在穆陵關。使人來言。總兵如不信我心。且不與總兵相見。當與平沿海諸城。然後相見。察罕帖木兒喜。卽以朝命。授豐爲山東行省平章。且重犒其所部。已而沿海登萊沂密等州。皆降附。田豐遂與察罕帖木兒相見。益都城西。時察罕帖木兒方調軍。攻圍益都。俾田豐軍塞益都南門爲營。圍數月。田豐頻往察罕帖木兒營議事。見其待朝廷使甚簡傲。又所施設。多用術數。無忠義心。田豐乃忿曰。我以山東全地降汝。又爲平海上諸城。與汝同心者。誠以汝爲元朝中興人物也。今若此。是漢室曹操耳。使汝爲曹

操。我豈不能自爲之耶。於是與同儕王士誠私謀曰。十五日。察罕帖木兒必巡長圍。我預椎牛釀酒。至日設席。邀其一切幕府官。大小部帥。酒行。汝選饒勇者。帶刀。各供給。每一人夾一人。以擊鼓爲令。自察罕帖木兒以下。皆殺之。謀定。察罕帖木兒於十四日晚時。從馬騎二人。來田豐營。王士誠者。卽掃地王也。其人躁勇。見察罕輕身出。意謂得閒。帶刀入侍。田豐目之使退。士誠謾認。以爲使之行事。轉身。自察罕帖木兒後。揮刀中其肩。田豐知不可止。遂擊鼓三。城中聞之。開門。納田豐軍。軍遂擁察罕帖木兒入城。城中人復推察罕帖木兒爲主。以拒朝廷。田豐不允。有王保保者。察罕帖木兒甥也。嘗養爲子。當入城之夕。諸校惶惑。不知所從。軍中頗有異論。同僉白瑣住有機識。遂倡言曰。總兵奉朝廷命。討逆寇。總兵偷死。朝命不可中止。況今總制官王保保。曾爲總兵養子。朝廷又賜名。擴廓帖木兒。若立之以爲主。總兵雖死。猶不死也。於是率先下拜。眾亦下拜。人心始定。及察罕帖木兒死。朝廷卽以擴廓帖木兒代領其眾焉。先是有白氣。

如小索起危宿。長百丈。掃太微垣。太史奏。山東當有大水。帝曰。不然。山東當失一良將。卽馳書戒察罕帖木兒。毋輕出。未至而已。及于難。帝聞其死。哭之慟。字羅帖木兒。在西京聞之。亦哭曰。察罕在。豈不省吾力耶。

壬寅至正二十二年。太子酷好佛法。於清寧殿置龍牀中坐。東西壁布長席。西番僧高麗僧。列坐滿長席。太子嘗謂左右曰。李先生教我儒書多年。我不省書中何言。所言何事。西番僧告我佛法。我一夕便曉。李先生。狀元李好問也。太子始學書。初甚尊敬。其後。放蕩無拘檢。專喜臨宋徽宗字帖。謂之瘦筋老。或告曰。徽宗亡國之君。不足法。太子曰。我但學其筆法飄逸。豈學他治天下。庸何傷乎。冬。擴廓帖木兒克益都。誅田豐。王士誠等。取其心以祭其父。餘黨械歸京師。

癸卯至正二十三年。老的沙提調京北白濮等千餘頃。號內府稻米。供給女寵并倚納等。非奉旨。不得擅支。初。祁后宗族在高麗者。多蒙官爵號。久則恃勢驕橫。強奪人田地子女。高麗王屢戒之。不從。王不勝怒。乃殺祁后一家。至是。后聞之。

謂太子曰。兒年已長。盍與我雪此恥。高麗舊王有族姓兄弟畱京師。於是議立高麗王。而以祁氏子一人爲相。撥蒙古漢軍萬人。送入其國。軍次鴨綠江。伏兵四起。僅餘七十騎。走還京師。餘盡殺溺死。祁后大慚。大兵克廬州。守將左君弼遁。淮西降附。野鴿巢興聖宮數年。蕃息數千。驅之不去。網之不盡。君子以爲興聖宮。祁后宮也。蒙古以韃靼氏爲父。翁吉刺伯牙吾氏爲母。家法相承。至七八傳矣。一旦家國將亡。家法先變。帝母回回氏。太子母高麗氏。此野鴿所以來巢。驗有開必先也。初庚子辛丑之歲。察罕。孛羅。常構兵爭晉冀地。分屬兩家。且諭之曰。土皆王土也。民皆王民也。何爭之有。而資政院使樸不花。與丞相搠思監。相爲表裏。專一貪黷無厭。視南北兩家賂遺厚薄。而啖之以密旨。南之賂厚。則謂南曰。帝有密旨。令爾併北而有之。北之賂厚。則謂北曰。帝有密旨。令爾併南而有之。以此兵禍綿綿不解。監察御史傅公讓。率同僚。彈此二人。后謂太子曰。樸不花。是我資政院老火者。看家資人也。臺家何無情而欲逐之。汝不能與我。

主張耶。明日。貶傅公讓於吐番。其餘臺官皆外除。惟老的沙在臺。已而新除臺官十餘人。又彈劾此事。又外除之。已而諸道臺諫皆以爲言。於是太子怒。欲并去老的沙。老的沙畏。遁入孛羅軍中。孛羅知其寃。藏老的沙於後寢。朝廷遍圖形求之不得。樸不花見臺憲彈劾不行。與其黨謀曰。今十八功臣家子弟。朝夕在帝左右。我與汝等平日所爲。渠親得知。臺家亦必知之。終當與我不利。搠思監曰。彼皆是老的沙黨也。老的沙既爲孛羅所庇。必請兵來犯京師。十八人爲內應。社稷能無危乎。遂執十八人。送資政院。問其謀害太子之狀。十八人苦楚不勝。皆自誣服。未幾。太子得咽喉疾甚急。左右曰。願釋十八人寃。太子可無禱而免。搠思監聞其言。令出十八人。皆安置外郡。中途皆死。間有以賄免者。其後孛羅入京師。皆召還。宏農盧氏山移五六里。八月。陳友諒與大軍大戰鄱陽湖。中箭死。大軍遂進圍武昌。其子理降。湖南荆湘諸郡歸附。

甲辰 至正二十四年三月四日。申酉時黑氣圍日。外兩頭有兩耳。引白氣一道貫

日。四月。知樞密院禿堅帖木兒領兵犯京師。禿堅帖木兒初嘗與丞相也先不花俱屯田西方。禿堅曾往也先不花屯。擡飯也。先自恃尊屬不受。禿堅忽然坐也先不花營外。呼軍士共啖之。也先不花患其爲人剛果不測。譖其有異志。遂差五府官訊之。禿堅怒曰。我有何罪。而使五府來。於是拘五府官。往告孛羅帖木兒曰。朝廷爲佞人作弄。至無公論如此。我當擁兵入京。問此舉爲誰。禿堅擁軍將行。樸不花。搠思監。稱詔書謂孛羅帖木兒與禿堅帖木兒同反。削孛羅兵柄。詔到孛羅營。孛羅手裂之。囚使者。禿堅軍至燕京。太子出古北口宜興州。以避之。禿堅遣人奏帝曰。我無負國家。國家負我。我非犯闕。願得奸臣某某而已。帝不得已。以搠思監。樸不花。付之二人。囚首至營中。禿堅爲加帽易衣。置搠思堅中坐。樸不花側坐而拜。搠思監與樸不花交跪。禿堅奏帝。求赦擅執大臣。稱兵犯闕之罪。及得二赦。然後釋兵入見帝。哭曰。左右蒙蔽陛下。非一日矣。倘循習不改。柰天下何。吾執二人去矣。陛下亦宜省過。卓然自新。一聽正人所爲。不

可復爲邪讒所惑。然後天下事可爲。祖宗基業。可固可守也。帝但唯唯而已。遂執二人詣李羅。李羅厚禮之。逾三日。始問以濁亂天下之罪。復笑而問。搨思監曰。我前日賂汝七寶數珠六串。何不以見還。因取六串來。李羅見之曰。非我家故物也。不受。再取乃是。李羅怒曰。在君側者。貪婪如此。我何可坐視而不清之乎。吾將舉兵。入清君側。七月二十五日。遂與老的沙。禿堅帖木兒。擁兵俱來。屯大都北門。入見帝曰。國家所用。皆貪婪軟弱。不足以濟天下大事。願召也速。除爲右丞相。臣爲左丞相。禿堅不花爲樞密知院。老的沙爲中書平章。於是同心竭力。整治庶政。執讒邪數人。并倚納九人。皆殺之。逐西番僧。罷諸造作。時帝方課築宮牆。立爲之罷。散驅禱后出宮。屏居厚載門外。是時。白瑣住軍盧溝。因挾太子。遁入擴廓帖木兒軍中。李羅始見帝。退謂老的沙曰。我生平不怕天子。今日見上位。使人似不能言者。何耶。省中事人。爾赤國公老的沙。爲我奏去可也。李羅入京師前一日。有大風從西來。黃塵蔽天。人馬立足不定。自西至東。止。

於更鼓樓西。及孛羅之住宅。適在其處。初削孛羅兵柄時。搠思監召承旨張翥。草詔辭曰。此大事。非見主上。不敢爲之。乃更召參政危素。就相府客位草之。草畢。過郎中。郎中託曰。我恰了一件好勾當。爲朝廷草詔。削孛羅兵柄。此正撥亂反正之舉也。郎中曰。相公此舉。莫不撥正反亂乎。客有暢勳在座。因曰。撥正反亂。其猶裸形搏虎豹也。孛羅兵至京師。聞之。召危素。責之曰。詔從天子出。搠思監客位。豈汝草詔之地乎。素無以答。將欲出斬之。左右解曰。當時素以一秀才。豈能與丞相可否。遂止。以其負天下才名。除和林省左丞。卽時上道。祁后初出。厚載門外。居造作提舉司府中。或言孛羅因夜巡警。至后所一宿。故后復得入宮。雷擊延春閣西脊。

乙至正二十五年。祁后納女孛羅。擇日成婚。孛羅促后。后曰。斷送之物未畢工。孛羅曰。女先至。斷送之物後至可也。乃先使兩口成婚。孛羅自入京。納女四十餘人。早飯必同堂共食。廚中每早辦飯四十品。隨諸夫人索食。其入朝時。諸夫

人盛飾成行。各進酒一卮。荒於酒色。銳氣消耗盡矣。擴廓帖木兒之討孛羅也。分兵三支。駐大都城外。遙制孛羅。而不與之戰。其東道以白瑣住領兵五萬。守京師中道。以顏高竹真領兵四萬。其西道以關保領兵五萬。俟間合擊之。孛羅命其將姚一百。與一支之屯通州者戰。一百被擒。孛羅自將兵。欲與之戰。至通州。取一女。不戰而還。二月七日。天雨。白鬣長尺許。狀如馬鬃。或詔於帝曰。此龍鬚也。帝果命收。而祀之如神。六月二十七日。天雨。魚長尺許。城中人家。皆取而食之。七月。孛羅索帝所愛女子。帝曰。欺我至此耶。有秀才徐施畚者。居家好奇。謀而平生憤漢人不得志於當世。故難仕進。至是。命爲待制。帝潛欲殺孛羅。與之謀。與謀者六人。曰洪寶。火兒骨答。上都馬。金邦。海和尚。帖古思不花。六人中。選饒勇善刀者。皆挾刀在衣中。外皆寬衣。若聽伺事。立延春閣東桃杏村內。一日。孛羅早朝小飯畢。將上馬回去。舊例。丞相將上馬。帶刀侍衛之士。疾趨先出。貼馬。俟丞相出。諸衛起立馬上。丞相就騎。然後衛騎翼丞相以行。當是時。丞相

出。與謀挾刀者。見其不得便。相顧曰。今日又罷了。徐施畚搖手曰。未也。忽有報捷音者。自西北來。失烈門謂孛羅曰。好消息。丞相宜奏去。孛羅推失烈門。失烈門強孛羅偕行。行至延春閣側。有杏枝。自上垂下。梢骨壓孛羅帽而墜之。失烈門遽爲拾之。孛羅疑曰。今日莫不有事否。時又有一人。突然橫過其前。孛羅方眙視。呼失烈門曰。平章。此人面生。言未既。一人批其頰。孛羅以手禦之。遽呼曰。我帶刀者何處。又一人斫其左耳而死。遂譁傳白瑣住軍在西宮裏。老的沙謬曰。你的那顏。又發酒風。恰斫我一刀。老的沙行稍遠。騎士又問。老的沙曰。丞相已被殺矣。擴廓大軍無數。在西宮裏。孛羅軍大駭散。西走。帝時居窟室。約曰。事捷者放鵠鈴。帝出自窟室。發令百姓。見川軍。皆殺之。百姓上屋。擊以瓦石。死者填巷。老的沙趨至孛羅營中。將其甲士。西北走。合秃堅帖木兒軍。先是。宗王辣黎謂帝已崩。孛羅爲皇帝。將兵討之。故孛羅遣秃堅帖木兒。將兵迎擊之。秃堅軍回。中途遇老的沙。秃堅知事變。謂老的沙曰。今上膿團不可輔。小婦孩兒。

亦非國器。不如徑請趙王南向。以定天下。趙王始然之。中慮事不成。醉以酒。縛二人。老的沙懼而乞憐。秃堅詈曰。彼非害我。我害其社稷也。遂執送二人。劓之。趙王太祖之屬也。當時世祖曾與之約曰。吾與汝共天下事。倘異日社稷有難。汝當助之。故憶其祖父言。悔不從秃堅言。正宮車必氏。聞孛羅難作。帝賞殺孛羅者六人。徐施畚不受賞。一夕逸去。十二月朔。日食。孛羅既死。以伯撒里爲左丞相。九月。擴廓護太子還京師。以擴廓爲太傅。右丞相河南王居京師兩月。擴廓居軍中久。樂縱恣無檢束。居朝怏怏不樂。朝士往往輕之。謂其非根腳官人。擴廓與左右謀之。或勸以請出治兵。肅清江淮。詔從之。洛陽山鳴。擴廓退位。仍以伯撒里爲右丞相。沙監答里爲左丞相。

丙午至正二十六年。擴廓既出。無意治兵。以父死未終喪。欲廬父墓側左右。或曰。總兵既受君命。出而中止。無乃不可乎。擴廓左右有孫翥。趙恆者。儉人也。畏江南強盛。欲緩其計。以容其奸。謂擴廓曰。丞相受天子命。總天下兵。肅清江淮。兵

法。欲治人者。先自治。今李思齊。脫里伯。孔興。張思道。四軍坐食關中。累年不調。丞相合調四軍。南出武關。與大軍併力渡淮。彼若依前抗不受調。則移軍征之。據有關中。四軍惟丞相意所使。不亦善乎。擴廓欣然從之。於是分撥關保。虎林。赤等統軍。從大興關渡河以俟。先劄付調關中四軍。張思道。脫里伯。孔興。俱不受調。李思齊得調兵劄。大怒罵曰。乳臭兒。黃髮猶未退。而反調我耶。我與爾父同鄉里。爾父進酒。猶三拜我。然後飲。汝於我前無立地處。而今日公然稱總兵。調我耶。各令本部曰。一戈一甲。不可出武關。王保保來。則整兵殺之。擴廓自是進兵關中。兩家相持一年。前後百戰。勝負未決。而國家大事去矣。擴廓由懷慶移屯彰德。素積糧草數十萬。坐食之。帝始疑擴廓有異志。謂左右曰。擴廓之出兵馬。肅清江淮也。其後不肅清江淮。而結讐關中。今也關中之戰。未定雌雄。乃復移兵彰德。其欲窺我京師耶。又怒。祁后及太子曰。向者。李羅舉兵犯闕。今日擴廓總天下兵。尾大不掉。爾母子悞我天下。今天下土疆分裂。坐受危困。皆汝

母子所爲也。怒氣不已。太子致被捶擊。走而免。朝廷累促擴廓南征。二月。擴廓不得已。命母弟脫因帖木兒及部將高貊。完者仲宜。駐兵濟寧鄒縣處。名爲保障山東。且以塞南軍入北之路。復命朝廷曰。此爲肅清江淮根本也。識者哂之。丁未至正二十七年。擴廓增兵入關。日求決戰。張李等軍頗不支。遂使人求助於朝廷。朝廷因差左丞袁煥及知院安定臣。中丞明安帖木兒傳旨。令兩家息兵罷攻。各率所部。共清江淮。孫翥進計於擴廓曰。我西事功垂成。不可誤聽息兵之旨。且袁煥貪欲之人也。此行非其本意。可令在京藏吏。祕賂其家。則袁必助我。而我事可成矣。擴廓如其計。袁果私布意於擴廓曰。不除張李。終爲丞相後患。於是攻張李愈急。七月。勝負猶未決。擴廓謂孫趙二人曰。今日果何如。二人同進計曰。關中四軍。獨李思齊最強。思齊破。則餘三軍不戰自服矣。今關中臨陣軍將。適與彼兵等耳。所以老師費財。相持不決。所畏者。惟高貊。而高貊見駐兵鄒縣。以吾二人觀之。南軍必不能越。王宣以侵我。宜抽高貊一軍。疾走河中。

自河中渡。急趨鳳翔。覆李思齊巢穴。出其不意。則渭北之軍。不戰可降。此唐莊宗破汴梁之策。關中定。然後出關中軍。以敵南軍。猶未晚也。即日從其計。高貆所部將。多李羅之黨。行至衛輝。部將夜聚議曰。我爲官軍。擴廓總兵用我。敵南軍。猶云可也。今者卻聞檄我。行糧星馳。前往河中。渡河。西趨鳳翔。李思齊乃官軍。以官軍殺官軍如何。於是河西平章張知院。劉沙參政。拔刀誓眾曰。不必多言。五鼓罷。扶高貆作總兵。不從則殺。作血城以去。約定。各率兵以待。八月六日。天未明。如其言以叛。高貆卽使其首領官胡安之。控告朝廷。使謝雪兒。領精騎。北奪彰德。使劉沙。領精騎。西奪懷慶。往彰德者。騎少兵精。僞作使人。以入據之。殺擴廓守將范國英。往懷慶者。騎多兵冗。懷慶守將黃瑞覺之。門閉。不得入。時擴廓在洛。而其隨部將士。盡在懷慶。識者以爲高貆此舉。輕率。疑不成大事也。先是。朝廷見擴廓不受調。而構兵讐殺。方議削其軍權。而未得其說。見高貆使來。大喜。升高貆知院兼平章。總河北兵。且詔擴廓。率潼關以東兵。下淮西。李思

齊等四軍。出武關。下襄漢。從高狃率河北軍兵。與也速及脫因帖木兒。完者仲宜兵。下淮東。然脫因帖木兒等盡劫山東以西民畜。而西經衛輝。擴廓盡率河洛民兵。而北渡懷慶。高狃懼擴廓兄弟有夾攻衛輝之勢。亦盡劫掠衛輝民畜。而北入彰德。朝廷無如之何。有帖臨沙伯元臣李國鳳者。進謀於太子曰。向者詔令各將。將本部分道進兵。而不立大將以總之。宜其不從也。古者太子入則監國。出則撫軍。太子何不奏主上。立大撫軍院以鎮之。凡指揮各將。皆宜出自撫軍院。然後行使權歸於一。而自內制之。庶幾可爲。又高狃一部背擴廓。而向朝廷。此宜別作名號。以旌異之。然後可也。於是開大撫軍院於京師。專制天下軍馬。省臺部院皆受節制。以高狃首創大義。賜其所部將。皆爲忠義功臣名號。九月。大兵克平江。擒張士誠。遂平福建兩廣。擒陳定觀。高狃率兵攻眞定。不克還。十月。大兵平沂海。十一月。大兵平定山東。擴廓自懷慶北。據澤州。

申戌 至正二十八年春。朝廷誘擴廓將李景昌。封爲國公。景昌以汴梁來歸。誘關

保保亦封爲許國公。關保保亦以晉冀來歸。擴廓自澤州退。據平陽。三月。高狃率兵攻懷慶不克。武庫火。四月。大兵平定梁汴。河南諸州相次降附。擴廓退據太原。五月。詔下勤除擴廓。令關保保與高狃合勢攻其東。張思道、李思齊、脫里伯、孔興合兵攻其西。閏七月一日。大兵自中灤渡河。三日平衛。五日平相。七日平廣平。八日平順德。是月一日。高狃出軍。迫太原城。列馬陣。高狃輕脫。從數騎巡陣。擴廓部將有毛翼者。望見之。易旗幟。綴陣於其西角。高狃果誤入其陣。卽合擒之。時關保保營在高狃營西。未及出布陣。急持高狃示之營中。軍亦皆潰散。保保亦被擒。兩營所部將士皆降擴廓。六月。大雷電雨。雨中火發。燒白塔寺。先是七月。大兵攻潼關。張李脫孔四軍皆潰而西矣。朝廷聞關保保、高狃敗被擒。大驚。遽罷撫軍院。歸罪太子。殺伯元臣、李國鳳等。盡復擴廓舊有爵位。閏七月。差哈完太子來。督擴廓出師。援燕京。且令勤王禦敵。擴廓得詔。乃提軍向雲中。或曰。丞相帥師勤王。宜出井陘口。向眞定。與河間也。速軍合勢。可以遮截南

軍若入雲中至燕京。沿途千里。無乃不可乎。擴廓曰。我潛師從紫荊口。出其不意。豈不可以圖勝。趙恆。曩元暉則曰。朝廷開撫軍院。步步要殺丞相。丞相乃要勤王。我駐雲中。觀其成敗。徐爲計耳。後七月二十七日。大軍至通州。帝得報大懼。卽日委淮王帖木兒不花。丞相慶童。畱守大都路。自出居庸關。遁入上都。八月三日。大軍至齊化門外。一鼓而克全城。淮王帖木兒不花。丞相慶童。大都路總管郭允中。中書左丞丁敬可。皆死之。是歲卽本朝洪武元年也。十一月。擴廓兵數十萬駐太原。大軍十月自碗子城入。破澤潞。十二月。擴廓部將賀宗哲。領兵來援晉冀。駐龍衛口子。去太原七十里。而大兵先鋒常遇春。夜斫擴廓營。遽至擴廓軍中。擴廓匹馬隻靴夜遁。於是晉冀之地悉定。

明年五月二十一日。大軍自通州進兵。克復永平。也速軍潰。於是檀順會利宜興大興。以次皆來附。先是大都平。馳奏南京。奉旨改爲北平府。仍令常國公。經營北方。其年五月。平永平等處。九月。平遼陽。獨上都與紅羅山未平。庚申帝在

上都。紅羅山在其東南也。速駐兵在上都。恃有紅羅山。爲之藩籬。紅羅山恃有上都。爲之援。而不設備。常國公使人覘知之。卽以大兵銳騎。銜枚。具十日糧。晝夜兼行。六月二十二日破紅羅山。七月二十七日破上都城。庚申帝乘天未明。出城。挈其后妃。遁入和林。和林在大漠之北。前元太祖所都之地也。八月二十二日。平懷慶鞏昌平源臨洮諸府。而天下遂大定矣。

野史斷曰。嗟夫。平定江淮。大事也。而帝付之擴廓。擴廓受之。庚申帝。何其易哉。且以世祖欲平江南。議論數年。或以爲可伐。或以爲不可伐。而太保劉秉忠則曰。未有其人。其後伯顏自西域奉使來。太保見之喜。而告之曰。伐江南。有其人矣。召之使前。世祖亦喜曰。爾豈諸侯王臣哉。其畱事朕。自伯顏受命出師。世祖曰。吾終夜憂懼。或日中不食。或中夜起坐。天以世祖爲之君。伯顏爲之臣。兢兢業業。尙不敢必其有成功也。觀庚申帝漫爾而命擴廓。擴廓亦漫爾而受之。其根本已非矣。而又庚申宣淫於上。擴廓肆愚於下。上淫而下愚。上虐而下暗。處

則昧經國之大計。出則失兵家之神機。及大兵一至。君臣俱及其禍。豈不宜哉。野史記曰。帝在位三十六年。當元統至元間。帝受制權臣。其後權臣相繼。或死或誅。帝恐懼之心弛。而寬平之心生。故至正改元之後。復興科舉。行太廟時享。賜高年帛。蠲天下民租。選儒臣歐陽玄等。講五經四書。譯貞觀政要。出厚載門耕籍田。禮服祀南郊。立常平倉。因水旱盜賊。下詔罪己。盡蠲被災者租。又命使宣撫十道。凡此皆其寬平之心之所爲也。惜乎夷狄之法。取士用人。惟論根腳。其所與圖大政爲將爲相者。皆根腳人也。而負大器。抱大才。蘊道藝者。舉不得與其政事。所謂根腳人者。徒能生長富貴。鬻羶擁毳。素無學問。內無侍從臺閣之賢。外無論思獻納之意。是以四海之大。萬民之眾。皆相率而聽夫鬻羶擁毳飽食煖衣腥膻之徒。使之坐廟廊據樞軸。以進退天下之人士。嗚呼。是安得而不敗哉。故庚申帝有寬平之心。一變而爲驕惰之心。驕惰之心既生。而哈麻邪淫之說進矣。是故易大傳之言。有曰。危者安其位者也。亡者保其存者也。亂者

有其治者也。是故君子安而不忘危。存而不忘亡。治而不忘亂。是以身安而國家可保也。向使庚申帝持其心。常如至正之初。則將終保大位。何至於遠遁而爲之虜哉。帝幼時貶居廣西靜江府。寓大圓寺。其未至寺。朝廷命刑部哈刺八失。館伴南行。舟泊劉家山下。忽有三胡孫。拜於岸上。手中若有所獻。帝使嬾公受之。則山果也。舟人皆異之。帝因呼使上船。又俯拜如初。帝因問之曰。汝更有伴當乎。胡孫手指岸上。帝使舟人隨其後視之。行三四里。至一洞。羣胡孫多至百數。皆相呼招以行。至船側。皆俯伏再拜。帝大喜。命舟人載之以行。至所寓寺中。則告僧以其故。其長老號秋江者。心獨異之。放之寺後山上。帝又命之曰。羣胡孫常餐我飯。汝不可以飢之。日爲我設兩餐。自後飯廊雲板響。羣胡孫皆纍纍然負攜幼小而來。故土人號爲胡孫寺。哈刺八失嘗受密旨。有侵害帝意。及見羣胡孫畏服狀。以爲終必有天命。始不敢縱。羣胡孫自帝北還。復率其類。沿岸相送。有老胡孫三十六枚。盡日哀鳴江岸。逾數月。皆擲死。識者以爲帝在位

三十六年之驗也。帝卽位。捨與常住租五千供之。其後復相率而返故山。帝居寺時。長老秋江嘗教之。讀論語孝經。日寫字兩紙。及詔回京師日。收拾書冊紙筆。藏小皮篋中。手自閉鎖。用馬馱之前行。頭髮嘗生蟣虱。使民嫗治之。告嫗曰。是雖血食我。我不忍殺之。不如以紙裹之。懸屋簷下。凍殺可矣。然亦時時薄劣。嘗鑽地爲穴。溺其中。和成泥以作戲具。又嘗領羣兒。作二十餘竿紙馬旗。巡城上。又好養八角禽。而調習之。或飛泊池中枯竹枝上。卽不顧靴鞮。下水捕之。嘗爲長老秋江所禁止。秋江又教之曰。太子乃國家金枝玉葉。不比凡民。見大官人來。切不可妄發言。亦不可不自莊重。由是府官司官來。輒坐長老法座。正身危坐。一無所言。府司官去。卽下座嬉戲如初。蓋惟其一時勉強。非出於涵養自然也。

野史斷曰。予聞友暢中之曰。帝不嗜酒。善書畫。又善觀天文。當沙關陷上都也。已而東行。左右勸帝宜出避之。帝知天象無傷。大言曰。毋多言。有福者來。吾何

難避之有。及大軍南來。帝復觀天象。左右勸守京師待援者。帝搖手不從。卽日遁矣。始曾畱意政事。終無卓越之志。自惑溺於倚納。大喜樂事。耽嗜酒色。盡變前所爲。又好聽讒佞。輕殺大臣。致使帝舅之尊。帝弟之親。男女猥雜。何殊聚麀。其後忌祁后諫。已強其子。使學佛法。朱文公有云。中國一變爲夷狄。夷狄一變爲禽獸。堂堂人主爲禽獸行。人紀滅亡。天下失矣。或曰。庚申帝以昏愚而失天下。非也。庚申帝豈昏愚者哉。其欲殺是人也。未嘗不假手於人。外示優容之狀。內實行其欲殺之意。至於死而有不知者。此豈昏愚者之所能爲哉。或曰。帝以優柔不斷失天下。亦非也。庚申帝豈優柔不斷者哉。自至正改元以來。權臣之跋扈有名者。皆死於其手。前後至殺一品大官凡五百餘人。皆出指顧之間。而未嘗有悔殺之意。此豈優柔不斷者之所爲也哉。然則竟以何者而失天下。由陰毒是也。自古有天下之君。履九五之位。惟秉陽剛之德。總攬陽剛之權者。爲能居之。若操陰毒之性。則適足以亡天下耳。故大易稱聖人之德也。必曰聰明。

睿智神武不殺而後已。夫外有聰明之聞見。內有睿智之機運。外有神武之雄威。內有不殺之仁慈。外聰明而內睿智。外神武而內不殺。然後爲聖人之全德。而後可以居九五之大位。彼庚申帝者。何足以語此。則其爲亡虜也。不亦宜乎。嗚呼。殺之爲害。豈爲人上者之心哉。殺一惡人。而天下之爲惡者懼。使天下之爲善者喜。如此而後殺之。是天下殺之也。殺一善人。而天下之爲惡者喜。使天下之爲善者懼。則爲人上者。寧不殺可也。故曰。古之聖人聰明睿智神武而不殺者。其斯之謂夫。

吉水權以制衡。當元末。隱居太行黃華山中。著有庚申外史。洪武初。詔修元史。采訪順帝遺事。其書曾上史館。所載順帝一朝。內煽外訐。顛覆傾亂由。本末詳盡。攷之元史多合。惟以帝爲瀛國公子。與史牴牾。說者謂事屬微曖。或出中原遺老傷故國舊君者之詞。不爲信史。誠卓論也。然如余應。袁忠徹。程克勤諸人。往往樂道之。夫晉元以牛易馬。晉書初無明文。然其說襍見沈約魏收之書。雖有宋孝王劉子元爲之辨誣。而終藉藉人口。况庚申帝事。本出當日宮闈之言。丙申之詔。卽順帝亦有不能諱者乎。大抵正史固貴徵信。而裨官不害傳疑。在善讀者。自得之耳。是書一名庚申帝史外聞見錄。又有從十五年起。分爲二卷者。實卽一書。非有異同云。癸亥冬至前四日。張鵬海識。

625.77

4421

0552250

中華民國貳拾六年七月重印

5.77

21